

Стихиры Успения на хвалитех, глас 4:

Хвалите Его во гласе трубнем, // хвалите Его во псалтири и гуслех.

От конец стекошася / апостолов лучшии, / богоначальным мановением, погребсти Тя, / и от земли вземлему Тя к высоте зряще, / глас Гавриилов радостию вопияху Тебе: / радуйся, Носило Божества всего. / Радуйся, Едина, земная с Вышними // Рождеством Твоим совокупляшая.

Хвалите Его в тимпане и лице, // хвалите Его во струнах и органе.

Хвалите Его в кимвалех доброгласных, хвалите Его в кимвалех восклицания. // Всякое дыхание да хвалит Господа.

Яже Живот рождшая, / к жизни преминула еси, / честным успением Твоим, безсмертней, / дориносящим Тя Ангелом, / Началом и Силам, / апостолам и пророком и всей твари, / приемшу же нетленными дланьми Сыну Твоему / непорочную душу Твою, // Дево Мати Богоневесто.

Слава, и ныне, глас 6:

На безсмертное Твое успение, / Богородице, Мати Живота, / облацы апостолы по воздуху восхищаху, / и, по миру разсеянные, / во едином лице предсташа пресвятому Твоему телу, / еже и погребше честно, / глас Тебе Гавриилов, поюще, вопияху: / радуйся, Благодатная, Дево, Мати Безневестная, / Господь с Тобою. / С нимиже, яко Сына Твоего и Бога нашего, // моли спастися душам нашим.